

# Las relaziuns tranter il Grischun ed il Vnuost, part 1

■ Sper l'artitgel da survista davart il Vnuost vegnan preschentadas en quest'emprima part las vals laterales che mainan vers il Grischun (la Val Schlingia, la part inferiura da la Val Müstair sco er il Pass dal Stielva che colliava il Tirol cun las Terras subditas da las Trais Lias). En la segunda part da questa pitschna seria suondan alura ils abitadis ed edifizis principals situads en la part superiura da la val principala (tranter il Pass da Raisch e Schludern).

## Vnuost

Vallada taliana en il Tirol dal Sid, situada en l'intschess superiur da l'Adisch, talian Val Venosta, tudestg Vinschgau. Il Vnuost appartegna a la provinza taliana da Bultsaun; el s'extenda da Naturns al vest da Meraun fin al Pass da Raisch (Planira da Damal) e cunfinescha en sia part superiura cun la Val Müstair e cun l'Engiadina Bassa. 2001 34 260 abitants. Dapi il temp da bronz è attestada ina colonisaziun continuada dal Vnuost. En il temp da fier tardiv viveva qua il pievel retic dals Venostes. Sin la collina da Tartsch (Tartscher Bühel) han ins chattà ina corna da tschierv cun in'inscripziun retica. Il davos temp è vegnidas scuvertas chasas reticas sin la spunda da Ganglegg en vischinanza da Schludern. Fortezzas e chastels da refugi, erigids dals Rets a partir da l'onn 16 a.C., han difficultà als Romans la conquista da la regiun dal Vnuost. Malgrà la construcziun da la Via Claudia romana (ca. l'onn 50 s.C.) sur il Pass da Raisch n'ha la val subi nagina colonisaziun e cultivaziun dal terren pli gronda. Per il temp medieval tempriv discurren ins anc d'ina cuntrada da gaud (*silva vinestana*). Enturn l'onn 500 furmava il Vnuost ina regiun da cunfin cun la Germania; la val è alura vegnida cristianisada sut in «dux e praeses Raetiarum».

Ina vasta colonisaziun dal Vnuost è succedida tranter il 10avel ed il 13avel tschientaner tras colonisaturs prevalentmain da lingua rumantscha, per gronda part purs libers. La colonisaziun tras glied da lingua tudestga (oravant tut Bajuvars) a partir dal 12avel tschientaner è vegnida promovida surtut da la claustra da Mariamunt. En il temp medieval existivan stretgas relaziuns tranter il Vnuost e Cuiira. Già a l'entschatta dal 8avel tschientaner ha il preses curretic Victor empustà in crap da marmel dal Vnuost per in monument sepulcral (*de Venosta*). Ecclesiasticmain ha appartegnì il Vnuost a partir dal temp medieval tempriv a l'uevstgieu da Cuiira. Secularmain furmava el en il temp autmedieval, ensemen cun l'Engiadina Bassa, in agen contadi. Cura che l'imperatur Konrad II ha emprestà il 1027 ils contadis da Bultsaun e dal Vnuost a l'uevstgieu da Trent, è s'entretschadas las fatschentas secularas ed ecclesiasticas. Cuiira è dentant sa fatg valair, sco quai che mussa il cas da Mortér dal 1181, cura che l'uevstg da Trent sco signur territorial ha pudì consecrar la chaplutta dal lieu a s. Vigeli mo cun la permissiun da l'uevstg da Cuiira.

En il 13avel tschientaner han ils conts dal Tirol conquistà la suveranità territoriala sur il contadi dal Vnuost e da l'Engiadina Bassa. A l'intern da quel contadi possedeveva dentant l'uevstgieu da Cuiira dretgs da bains e glied dal Vnuost, concedids ad el già l'onn 967 tras l'imperatur Otto I. I sa tractava d'in possess considerabel che sa concentrava oravant tut sin il Vnuost Superiur. Luevstg da Cuiira laschava exercitar ses dretgs seculars en il Vnuost tras avugads ed auters uffiziants. Sco avugads èn stads activs en il temp medieval tardiv ils signurs de Matsch ch'eran dentant entretschads onns a la lunga en faidas cun ils uevstgs. La glied da la Lia da la Chadé, ch'appartegneva a l'uevstgieu da Cuiira, sutstaveva ad ina dretgira episcopala da Cuiira domiciliada a Damal. Chau da questa dretgira era in chapitani numnà da l'uevstg cun sedia sin la Fürstenburg a Barbusch.



Vers il Pass dal Stielva: la baselgia da Trafoi cun il massiv da l'Ortler.

FOTO: REINER KONRAD / PIXELIO

En il 16avel tschientaner ha la reformaziun cuntanschì la part superiura dal Vnuost, oravant tut Barbusch ch'ha disponì per in temp perfin d'in plevon reformà. La claustra da Mariamunt ha dentant cumbatti a medem temp la nova cardientscha e la lingua rumantscha, proscritta sco lingua dals reformads. Il 1592 è sa consolidà il cunfin tranter Tuer e Müstair e cun quai era il cunfin linguistic tranter il Grischun ed il Tirol. Il 1618 è passada la dretgira d'Untercalven, quai vul dir la part dal Vnuost Superiur ch'appartegneva politicain anc a l'uevstgieu da Cuiira ed a la Lia da la Chadé, al Tirol ed è cun quai ida a perder al Grischun. Dal punct da vista ecclesiastic è l'uevstgieu stà capabel da s'affirmar en il Vnuost fin il 1816, alura è la vallada vegnida sutmassa a la diocesa da Brixen. Dapi l'Emprima Guerra mundiala (Pasch da Saint-Germain) appartegna il Vnuost, anc oz prevalentmain da lingua tudestga, ensemen cun il Tirol dal Sid a l'Italia.

Cun l'amplificaziun dal Fuorn (1870) e da l'Umbrail (ca. 1900) ha inizià in augment modest dal traffic da martganzia e da persunas sur il cunfin. A partir dal 19avel tschientaner èn blers dal Vnuost vegnids sco famegls, fantschellas, praders e pasters en Val Müstair ed en Engiadina. Numerus han alura preni domicili en questas vals ed èn s'assimilads. A l'entschatta dal 21avel tschientaner chattan cunfinaris dal Vnuost lur gudogn en l'economia da la Val Müstair. Da l'autra vart han acquistà e cultivesch actualmain purs da la Val Müstair bains agriculs en il Vnuost Superiur. La barriera linguistica metta tscherts limits a contacts culturals pli stretgs. La reavertura da la viafier Damal-Meraun (2005), realisada cun agid d'interpresas svizras, cuntinuescha ad augmentar la valur dal Vnuost sco regiun turistica. *Martin Bundi*

## Schlingia

Val laterala dal Vnuost Superiur, pass e fracziun da la vischnanca taliana da Damal. La Val Schlingia (talian Val Sliniga, tudestg Schlinigal) s'avra a Schlü vers l'ost e sa sparta suenter 2 km en la Val d'Arunda ed en la Val Schlingia per propri. A la fin da questa val maina il Pass Schlingia (2295 m) en la Val d'Uina e tras questa en l'Engiadina Bassa. 1159 *Sliniga*. La Val Schlingia è ina tipica cuntrada da bains. La pli veglia colonisaziun da la val pudess datar dal temp carolingic; ils bains han appartegnì en scadin cas ecclesiasticain fin en il 19avel tschientaner a la pravenda da S. Steffan sin la spunda a la sortida da la val.

In gond moviment da cultivaziun da terren ha gi lieu en il 13avel tschientaner

en connex cun la fundaziun da la claustra da Mariamunt al sidvest da Barbusch. Ultra da lavurs da runcada, exequidas dals libers Rumantschs da Schlü e Barbusch, è la regiun era vegnida urbarisada e cultivada tras subdits da l'abazia da Mariamunt ch'era daventada qua tras la proprietaria principala da la val, munida cun la giurisdicziun bassa. La Val Schlingia è vegnida cultivada e sanada intensivain en il temp medieval. Anc oz ve'ins fastiz dals implants da sauar en la regiun dal sparta-auas al Pass da Schlingia.

Las regiuns d'Arunda e Schlingia èn stadas strategicain fitg impurtantas durant la Guerra svabaisa (1499). Ils 21 da matg 1499 èn ids ils Grischuns en posiziun cun lur truppa principala davant il rempar a la Chalavaina, entant ch'ina armada da 2000 umens era entrada la notg sequenta sur l'Alp Tell e la Sella da Tell (2380 m) en la Val Schlingia ed aveva, la damaun dals 22 da matg, vegnind da Schlü e Laad, circumdà la fortezza da davos e segirà qua tras als Grischuns la victoria en la battaglia uschè decisiva a la Chalavaina. *Martin Bundi*

## Chalavaina

Stretga tranter Tuer e Gluorn che s'extenda a l'ost dal cunfin naziunal tranter la Val Müstair svizra ed il Vnuost talian, tudestg Calven. La Chalavaina è stada in dals lieus centrals da las guerras svabaisas tranter la Confederaziun e l'Imperi tudestg. Ils motivs immediats per la Battaglia a la Chalavaina èn stads in assagl tirolais a la claustra da S. Jon a Müstair ed ina campagna da rapina en l'Engiadina Bassa la primavaira dal 1499. Suentententativas d'invasiun, interprendidas senza success da pievels guerrescs svabais al Pass S. Glienzi ed en il Partenz, ha il retg Maximilian concentrà sias offensivas principalas a la flanca sidost, en il Vnuost Superiur. Il 1499 han ils Austriacs erigi in rempar da lain a la Chalavaina. Quel tanscheva d'ina vart da la val a l'autra e furmava ina vaira fortezza cun turs a plirs plauns munids cun balestreras, armada cun quatter bastiuns.

Ils 22 da matg 1499 han ils Grischuns conquistà la fortezza austriaca a la Chalavaina, recurrind ad ina tactica raffinata: entant ch'ina part da las truppas ha tschinclà la fortificaziun, ha l'armada principala pudì assagliar ella frontalmain. Benedeg Fontana ha chattà la mort eroica a la Chalavaina. Simon Lemnius ha descrit la battaglia en sia «Raeteis». La victoria a la Chalavaina è stada ditg l'eveniment decisiv en il cumbat da las Trais Lias per la libertad e l'indipendenza (Pasch da Basilea dal settember 1499); el-

la e ses erox Fontana vegnan dechantads tranter auter en la chanzun «A Tgalavaina» da Georgius Schmid von Grüneck (text: Alfons Tuor), cun il refrain patetic: «Plitost la mort che sclaveria ei la parola dils Grischuns». Dapi il 1927 ha lieu il matg (fin il 1955) e zercladur (a partir dal 1959) il prestigius Tir da Chalavaina (standarta ambulanta, 14 giadas fin il 2008). *Martin Bundi*

## Tuer

Vischnanca situada lung la via en la provinza taliana da Bultsaun (Tirol dal Sid), cun ils aclauns Rifair e Puntweil, al cunfin cun la Val Müstair. 9avel tschientaner Tuburis, talian Tubre, tudestg Taufers. 2010 995 abitants. Il toponim Tuburis designava en il temp autmedieval la val tranter Müstair e Damal (numnà en il cudesch da fraternisaziun da Reichenau *Monasterium Tuburis*). La vischnanca è probablmain naschida pir enturn il 1100. A Tuer sa chattan l'ospizi da S. Jon d'impurtanza istorica sco era las ruinas dals chastels dad Ober- ed Unterreichenberg (numnads oriundain era chastè da Rotund) cun lur turs radundas dal 12avel tschientaner. Omadus appartegnevan temporain als signurs de Reichenberg ed als uevstgs da Cuiira, il chastè superiur è alura passà als signurs de Matsch, quel inferiur als signurs de Schlandersberg.

Tuer furmava, ensemen cun la Val Müstair, la dretgira d'Obcalven. A partir dal 1415 ha appartegnì la vischnanca a la Lia da la Chadé, fin al mument che la giurisdicziun è ida a l'Austria il 1657/65. Durant la Guerra svabaisa (1499) è la vischnanca da Tuer vegnida destruida. Ina colliaziun impurtanta manava tras la Val d'Avigna e sur il Pass da la Cruschetta (Scharler Jöchel) al vitg da minieras S-charl. Tuer è catolic e da lingua tudestga, ils toponims èn dentant per gronda part restads rumantschs. *Paul Eugen Grimm*

## Glurns/Glorenza (Gluorn)

Citad situada a la riva da l'Adisch en il Vnuost, tudestg Glurns, talian Glorenza (uffizial: Glurns/Glorenza). 2008 888 abitants. Dapi l'onn 15 a.C. ha Gluorn appartegnì a la provinza romana Raetia, dapi il temp medieval tempriv a l'uevstgieu da Cuiira ch'ha possess era dretgs feudals a Gluorn fin viaden il 16avel tschientaner. Enturn il 1290 ha Meinhard II von Tirol installà cun grond success ina fiera a Gluorn che concurrenzava quella da Müstair. Cun la transfurmaziun da Gluorn en ina citad fortifitgada cun dretg da fiera han ils conts von Tirol augmentà lur influenza a donn e cust da l'uevstg da Cuiira.

En il temp medieval tardiv ha Gluorn gi sia fluriziun: la citad disponiva d'ina atgna mesira, serviva da deposit da sal e da metals, provegnints dal Grischun e da l'Italia respectivamain barattads cun quests vischins, ed era ina staziun impurtanta dals Fuggers (schlatta da commerciant svabais domiciliads ad Augsburg dapi il 1367). Ils purs da l'Engiadina Bassa pudevan vender lur muvel a la fiera da Gluorn senza avair da pajar dazi, els avevan dentant da contribuir al mantegniment da la punt da Martina e da la via a Danuder.

Il 1499 han ils Grischuns refusà il contract da pasch da Gluorn ed han destrui la citadetta en la Battaglia a la Chalavaina. La citad da Gluorn è alura puspè vegnida reconstruida sco garnischun cunter il Grischun. La lingua rumantscha è sparida en il 17avel tschientaner en consequenza da la ferma germanisaziun dapi il temp medieval tardiv. Il 2001 eran 96,5 % dals abitants da Gluorn da lingua tudestga, 3,4 % da lingua taliana. A l'entschatta dal 21avel tschientaner eran occupadas numerusas persunas activas da Gluorn sco stagiunaris en Svizra. *Adolf Collenberg*

## Pass dal Stielva

Passadi a 2757 m che colliava il Vnuost Sura talian (Stielva e Prad) cun la Vuclina (Buorn), talian Giogo dello Stelvio, tudestg Stilfserjoch. Il Stielva para d'avair servì già en il temp autmedieval da guntgida al Pass da l'Umbrail (traffic regiunal e barat commercial sporadic). Cun l'existenza da fieras a Müstair (1239) e Gluorn (1290) è creschì il traffic commercial. Enturn il 1319 ed il 1328 ha accordà il cont e duca tirolais Heinrich a la plipart da las citads commercialas en la Lombardia il privilegi da laschar transportar la martganzia sur Buorn vers il nord; sco via da sauma vegniva plitost dumonda l'Umbrail ch'il Stielva. La martganzia sa constituiva da sal dad Alla e da ponn grisch (carpun) che vegnivan transportads vers il sid e da vin transferi vers il nord.

Suenter l'incorporaziun da la Lombardia a l'Austria il 1815 vuleva quella realisar, per motivs strategics, ina via directa dal Tirol en la Lombardia. Ina tala è vegnida construida il 1819–25 sut la direcciun da l'inschigner da Brescha, Carlo Donegani, ch'ha era realisà la via dal Spleia; cun ina larghezza da 7–8 m e numerusas construcziuns d'art è stada quella via in'ovra temeraria. Dapi il prim d'avust 1825 circulava durant la stad ina posta da chavals austriaca da Buorn a Stielva en la Val Trafoi. Dal 1869–76 ha garantì la posta svizra – ad agen quint, ma subvenziunada da la posta taliana – ina posta da chavals da Colico (Lai da Com) a Buorn, nua ch'ils passagiers avevan alura coincidenza a la posta sur il Stielva. Il 1848 ed il 1859 èn stadas staziunadas truppas militaras sin il Stielva.

Il 1915–18 èn sa cumbattidas armadas talianas ed austriacas sin il Stielva, entant che truppas svizras protegivan ils cunfins nazionals. Suenter la construcziun da la via da l'Umbrail ha installà la Svizra il 1913–14 ed il 1922–27 ina posta da chavals da Sta. Maria en Val Müstair fin al Stielva. A partir dal 1927 èn circulads sin quest tschancun da via autos postals, cun in'interpuziun en ils onns 1940–46. Il Stielva serva oz mo pli al traffic turistic e giada durant la stad in viv traffic da sport da skis. *Martin Bundi*

## Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: [www.e-lir.ch](http://www.e-lir.ch); versiun stampada: [www.casanova.ch](http://www.casanova.ch) u en mintga libreria.